

حلم .. كالعادة

بتيجي ف حلمي تضحك لي
 وييجي الصبح مش شايفاك
 ملاحك لسة حافظاها
 بدور في الوشوش عنك..
 ولسه بردو مش لاقياك
 كأنك طيف بيندهلي
 ومش شايفاه لكن سامعاك
 رسمت كل تفاصيلك
 ورصيتها في أحلامي
 حكيت ياما في أوصافك لأيامي
 مصدقونيش..
 وقولت يجوز هنتقابل
 لقيتك فجأة قدامي بتضحك لي

بتندهلي.. ولما أنا جيت
أنت مشيت
أغمض عيني أفتحها
وأقول هو حلم كالعادة
أقول هنسأك فافكر فيك وبزيادة
وأنام أحلم بضحكة
قالتلى ياما كلام
بعيونك معدية
بترمي بشوق عليا سلام
لكن بردو أقول أحلام
وأتوه مع زحمة الأيام
فترجع تاني تظهر لي
في بالي سؤال
أنا بسهر ليالي كثير.. بتسهر لي؟